

Carnaval 47

CU POPO Y SKRIBI

ARUBA TIVOLI TA RECONOCE E HUBENTUD CARNAVALESCO

Mas di 20 aña pasa un "Baby-boom" den e miembronan di Aruba Tivoli Club a inspira e mayornan (mayoria di nan di edad hoben) pa organisa pa nan yunan un parada di stroller.

Y ariba un Diadomingo mainta di Carnaval, acompaña pa un brassband chikito, 17 baby den nan stroller, dorna tur na blaas y pusha pa nan orguyoso mayornan, saliendo for di Wilhelmina Park, a dal un rond chikito den "caya grandi" pa despues regresa Tivoli caminda un gran fiesta di Carnaval di mucha a tuma lugar.

Asina e prome Ballonnenoptocht di Aruba Tivoli a cuminsa. Desde e aña ey en adelante e ballonnenoptocht aki a crece den tamaño y a bira un luhoso parada di mucha, carosa y disfraznan masha colorido y masha luhoso. Hasta tabata worde comenta cu Tivoli a bolbe bek (a la miniatura) den su gloria di su paradanan luhoso di e

añanan sesenta y setenta, tempo cu Tivoli a yega di sali diez aña consecutivo "Group of the Year". Pero tur proceso ta yega y pasa su punto culminante. Durante e añanan cu a transcuri e "Baby-boom" di e ballonnenoptocht a cuminsa bira "teenagers" y ballonnenoptocht a cuminsa sinti e efecto aki tambe. Pues poco poco e grupo (dilanti) di mucha ariba carosa tabata bira menos mientras cu e grupo (patras) di "teenager" nan den nan estilo) bisti cu t-shirt y apoyando nan reinanan, tabata birando mas y mas masal.

Desde algun aña caba e grupo hubenil aki practicamente tabata domina e "Ballonnenoptocht". E proceso aki a haci cu Tivoli Club mester a reconoce e "muchanan" di e edad aki cu francamento, excepto e apoyo masal cu nan ta duna nan reina den stadion, no tin un lugar bon reconoci pa nan den nos carnaval.

Nos mester corda cu nan tambe te futuro di nos Carnaval.

PROME PARADA HUBENIL

Pa e motibonan ariba menciona, Aruba Tivoli Club, pa medio di su reina Emily Arends y su reina hubenil Aisette Rivera ta invita tur Reina y Reina hubenil di Carnaval 2000 (saliente) y tur reina yr eina hubenil di carnaval 2001, pa joinnan den e (prome) parada hubenil, cual evento lo reemplaza e ballonnenoptocht di Tivoli.

Pa un reina por participa a e parada aki e mester por identifica su (cu sjerp y corona) cu e ta reina di su organisacion. E lo ricibi tickets pa refresco gratis y su fansnan mester ta reconocible (t-shirt).

RUTA PA E PARADA DI TIVOLI

Pa e parada aki tambe nos prins cu pancho hubenil y grandi (2001) ta keda cordialmente invita. E (prome) parada hubenil aki lo tuma lugar Diadomingo awor y lo sali 11'or di mainta na e cruzada den Caya Betico Croes dilanti Marathon El ctronics. E parada lo tuma direccion Vondellaan pero lo bira rechts dilanti Banco di Caribe drenta Wilhelminastraat y lo tuma henter e caya aki te den Havenstraat, terminando asina tras Royal Plaza ariba e parkeerplaats tras di e parkeerplaats di e station di Arubus.

